

Date – 01/07/2025

Time - 7:30 -7:40Hrs

HEADLINES

- Chief Minister Pu Lalduhoman Sairang rel kawng chu hawn mai theihin an peih tawh a, Prime Minister hman hun an nghak a ti.
- Chief Minister Pu Lalduhoma'n Mizoram sorkarin loneitute thar chhuah sawhthing a lei zawh sak rualin mipui rilru a siamtha nghal a ti.
- PWD Minister Pu Vanlalhlalan Vairengte leh Sairang inkar kawngpui siamthat lung trip 50 vel ngaihtuhsak a tum thu Mizoram Tipper Assn Kolasib Hq a hrilh.
- Dr. K. Beichhua, MLA chu BJP Mizoram State President thar atan puan a ni.



PEACE DAY

Chief Minister Pu Lalduhoma chuan Remna Ni hman chuan hnamdang leh sakhaw dangte nena inremna thlen se a duh thu a sawi.

Nimina MZP buatsaih Remna Ni vawi 39-na Lammual-a lawmnaah he thu hi sawiin Chief Minister Pu Lalduhoma chuan Sairang rel kawng chu hawn mai theihin an peih tawh a, Prime Minister hman hun an nghak tih a sawi a. Union Railway Minister Ashwini Vaishnaw nen pawh an inkawm tawh thu sawiin, Sairang Railway Station chu khawvel railway station dangte el pha, world class a siam turin a phal sak tih a sawi a. India rama rel chak ber chi Rajdhani service pe tura an dilna chu a phal sak bawk tih sawiin Sairang atangin Tripura, Sairang atangin Kolkata, Sairang atangin Delhi Rajdhani service a awm dawn a ti a. Hnamdang an lo luh zel dawn avangin ILP chungchangah te tihtur nasa tak an nei dawn a ti a. Tunlai thiamna a thlunkhawm vek anih tawh dawn avangin Mizote chu sakhaw dang bia te, tawng dang hmangte, hnamdang nen chen ho thiam a ngai dawn tih a sawi a ni.

(Byte: Chief Minister Pu Lalduhoma)

Chief Minister chuan Akyab, tuna Sittwe an tih tak lawng chawlhmun pawh turin KMTTP kawngpui lai chu zawhfel tep a ni tawh tih sawiin he kawngpui hi a tlang chuan Mizoram mai ni lovin India ram insumdawnna kawngpui a ni dawn tih a sawi a. Mizoram kawtchhuah chu chhim lamah a insawn tawh dawn tih sawiin, chu chuan nasa takin Mizoram a nghawng dawn a, chumi atana lo inbuatsaih dan tur rel turin Chief Secretary hnenah Study team a din tir tih a sawi a ni.

Remna Ni lawmna inkhawmah hian khuallian hian Remna Ni puanzar pawt pharhin, 1st Bn. MAP Brass Band ten "Ro min reksak ang che" tih hla mawi takin an rem a, inkhawmna hi tan zui nghal a ni. Larsap Gen. Vijay Kumar Singh chuan Remna Ni pual hian Mizoram mipuite hnenah social media kaltlangin duhsakna a hlan a. Remna vawng nung zel tura chahin ram chhunga state ralmuang ber a lo ni ta chu ropui a tih thu a sawi a ni.

Remna Ni hi MNF party chuan Aizawl-a an party pisa Hnam Run-ah leh district khawpui hrang hrangah an lawm a, an party hruaitute’n an hmanpui a. Zoram Research Foundation (ZORF) leh NEICC Peace Centre, Shillong leh Aijal Club tang tlangin Remna chungchang zirhona Aijal Club-ah an buatsaih bawk.

Assam a district pakhata Mizoram a awm lai, Mizo district tih a nih lai March ni 1, 1966 khan Pu Laldenga kaihhruai MNF te chuan India ram atanga inlakhram tumin ralthuam an lek tan a. Kum 20 zet Mizoram chu rambuui a a awm hnu in kum 1986 June ni 30 khan remna thuthlung ziah a lo ni ta a. Sorkar laipui aiawhin khatih lai a union home secretary Pu RD Pradhan, rammu mek MNF aiawhin Pu Laldenga leh Mizoram sorkar aiawhin khatih laia chief secretary Pu Lalkhama te’n inremna thuthlung hi an ziah a. Inremna thuthlunga Mizoram leh Mizote thuneihna sang zawk leh inhumhahna bik ziah lan chu India Constitution article 371G-ah thun a ni nghe nghe a.

Inremna thuthlung avang hian MNF rammute chuan an ralthuamte tungin Mizoram union territory chu kum 1987 February ni 20 khan state puitling a hlankai a lo ni ta a. Sorkar laipui-in hel pawlte inremna a siampui zawng zawnga hlawhtling bera ngaih chu Mizo Inremna hi a ni a, hemi hnu atang hian Mizoram chu ram puma state ralmuang ber a lo ni ta hial a ni.

<><><>

GINGER PURCHASE

Chief Minister Pu Lalduhoma’n Mizoram sorkarin loneitute thar chhuah sawhthing a lei zawh sak ruala mipui rilru a siamtha chu lawmawm a tih thu a sawi a, mipui thinlungah a thlawna dawn tumna a awm tawh lova, rinawmna, taimakna, leh thawhrimna in an ngaihtuahna a hruai tawh a ni a ti.

Nimina ZPM kaihhruai Mizoram Sorkar Bana Kaih - Thlai Thar Market hnuaia kum 2024-25 sawhthing thar hun chhung atana sawhthing lei kharna inkhawmah Chief Minister Pu Lalduhoma chuan he thu hi sawiin, Mizoramah hetiang thlai thar lei hi a tum khatna a ni tih a sawi a. Sorkarin a hralhna-ah a inrawlha rate tlahniam tur an ven sak loh chuan sumdawng inthurualte’n an lo tih fo thin angin a tirah a man sang deuh hlekin an leisak a, sawhthing market a tha ni a a lan avanga loneituten sawhthing an cho khawl teuh laiin a man an tihnam thut thin a, sawhthing an chawh khawl sa a tawih chhiah hma in, tlawm te te in an hralh a ngaih phah thin a, a ti a. Hetiang a thlen tawh loh na’n hian hma an la tih sawiin, Mizoram sorkarin sawhthing a leisak vawikhatna-ah a kum chhiah kum a thleng chuan ZPM policy thatzia pholangtu a ni a ti a, kuminah ZPM sorkar lo ta se, sawhthing hralh ngaihna hre lo tam tak an awm dawn a ti a. Mizoram sorkarin loneitute thar sawhthing a lei zawh sak ruala mipui rilru a siamtha chu lawmawm a tih thu a sawi a, sem policy a bova, mipui thinlungah a thlawna dawn tumna a awm tawh lova, rinawmna, taimakna, leh thawhrimna in an ngaihtuahna a hruai tawh a ni a ti.

(Byte: CM Lalduhoma)

Agriculture Minister Pu PC Vanlalruata pawhin he hunah hian thu sawiin, loneituten an thawhrim rah an tel chu lawmawm a tih thu a sawi a, lo lam thil chu buaipui tham a awm loh chuan engmah a ni lo a ti a. Loneitute tana hlawkpui tham tur, awmze neia sum an lakluh theihna turin sawhthing an buaipui angin thlai dangte pawh kalphung mumal tak hnuaia buaipui a ngai a, chutianga an tih loh chuan loneitute tan

dinchhuah theih a ni lo a ti a. Hun lo awm zel turah pawh sorkarin market buaipui tham nei turin loneitute a zirtir ang a, hma an la zel dawn tih a sawi a ni.

Mizoram sorkarin loneitute thlai thar hralh chhuahna tur buaipuitu a din, Mizoram Agricultural Marketing Board (MAMB) hmalakna hnuaiah kumin February ni 20 khan sawhthing lei tan a ni a, April ni 21 atangin a thawh hnihna atan sawhthing lei leh a ni a, vawiin thlengin sawhthing quintal nuai 2, sing 3, sang 3 leh 603, cheng vbc 96.4 man a lei sak tawh a, loneitute sawhthing chu a lei zawh sak tawh ni-in an sawi. Hetihlai hian lei tawh, pawisa pek chhuah tur, portal-a la upload kim loh a awm avangin pawisa pek zawhah data chiang a awm chauh dawn niin MAMB member te chuan an sawi a ni. Sawhthing bakah hian Mizoram sorkar chuan nikum kum tawp atang khan loneitute thar chhuah Mizo buh quintal 1,437, cheng nuai 44, sing 1, sang 8, 400 man, Aieng quintal 400, hmunphiah empannelled buyer, Non-empannelled buyer leh ZOHANCO kaltlangin quintal sing 4, 327 a lei sak bawk a, hetihlai hian Hmarcha erawh a lei sak lo thung a ni.

<><><>

VAIRENGTE-SAIRANG HIGHWAY

PWD Minister Pu Vanlalhlana chuan nimin khan a pisa-ah Vairengte leh Sairang inkar kawngpui siamthat leh enkawl chungchangah National Highways & Infrastructure Development Corporation Limited (NHIDCL) hotute leh Mizoram Tipper Association (MTA), Kolasib Sub-Headquarters aiawhte a kawm.

He inkawmhona hunah hian PWD Minister chuan Vairengte leh Sairang inkar kawng chu kum 2020 khan Ministry of Road Transport & Highways (MoRTH)-in NHIDCL kutah a hlan tawh tih sawiin, hetih hunlaia NHIDCL-in a lak theih loh chhan PWD hnathawh laklawh lai chu nikumah thawh zawh niin, NHIDCL kutah a awm tawh a ni, a ti a. National Highway chu MoRTH ta a nih thu sawiin, kawng siam leh enkawl zuina senso atana sum pawh MoRTH-in a tum thin a, a enkawl tur pawh a ruat thin a ni, a ti a. PWD Minister Pu Vanlalhlana chuan NHIDCL in hma an lak zui mai loh avangin Mizoram sawrkar chuan lirtheite an tlan hram hram theih nan ti-in helai kawng enkawl na'n hian nikum tangka kumah cheng nuai 200, kuminah cheng nuai 111, sing 7 leh sang 4 a seng tawh tih a tarlang bawk.

He hunah hian pawimawh leh tul hrang hrangte sawiho niin, he kawngpui hi NHIDCL hnuaia awm a nih thu leh Mizoram PWD in hemi atan hian central sorkar atangin sum a hmuh theih tawh loh thu tarlan a ni a. NHIDCL kawng enkawl lai siam mekna atana sawrkar a insen lai hian, a that theih loh avangin MTA te an hnatlang a. An neihin a tlin tawh loh avanga PWD hnena boulder trip 50 ngaihtuahsak tura an dilna chu PWD Minister chuan a ngaihtuahsak tur thu a sawi a ni.

<><><>

AIR NEWS ON SOCIAL MEDIA

Chanchintha hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchintha hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchintha puan leh a ni ang.

<><><>

Dr. K. Beichhua, MLA chu BJP Mizoram State President thar atan puan a ni.

Central BJP-in National RO for Mizoram atana an ruat, BJP National Mahila Morcha President Pi Vanathi Srinivasan chuan nimin khan Atal Bhawan, Aizawlah BJP Mizoram State President thar atan Dr. K Beichhua chu chuhtu awm lo a President atana thlan a nih thu a puang a. Pi Srinivisan chuan nimin Pathianni khan BJP Mizoram State President thar hi inlungual taka thlan a nih thu sawiin, inthlanna chuhtu awmchhun, Siaha Bialtu MLA nilai, Dr. K. Beichhua chu kum 2027 thleng President a ni dawn a ti a, term hnih chhung BJP Mizoram State President lo ni tawh Pu Vanlalhmuaka a thlak dawn a ni.

BJP Mizoram State President thar Dr. K Beichhua chuan thu sawiin an party chu a bulthut atanga tihchak a ngaih thu a sawi a. Unit tam zawk nei thei turin hma an la chho zel dawn tih a sawi a. Dr K Beichhua chuan Mizoramah BJP chu Kristian dotu party tih deuhthawa hriat a ni thin tih sawiin Mizo mipuite hnenah BJP chu Kristian dotu party ni lovin Prime Minister Narendra Modi-a'n ram tihhmasawn, Viksit Bharat, Viksit Mizoram chu a thupui ber a ni tih zirtir a pawimawh hle tih a sawi a. BJP in hmasawwnna a ngaih pawimawhzia mipuite'n social media chak takah an hmuh thu sawiin mi tam takin an party an zawm belh zel a beisei thu leh, kum 2028-ah chuan Mizoramah sorkarna an siam ngei a beisei thu a sawi a ni.

Dr. K. Beichhua hi kum 2013 inthlan khan MNF ticket in Siaha bial atangin thlan tlin a ni a, chumi hnu inthlan hnukung ber kum 2018 khan a bial ngaiyah MNF ticket vekin thlan tlin a ni a, MNF kaihhruai Mizoram sorkarah Minister of State lo ni tawhin, Social Welfare, Excise & Narcotics, AH&Vety leh Sericulture department te a lo enkawl tawh a, kum 2022 December ni 13 khan khatih hunlaia Chief Minister Pu Zoramthanga thurawn angin, Minister atangin banna a thehlut a, kum 2023 January thla khan MNF chuan an party kalha chea puhin an party primary member atangin chawlhtir a ni leh a. Hemi hnu hian BJP a zawm a, kum 2023 Mizoram Assembly inthlanpuiah khan Siaha bialah BJP ticket-in a ding a, hneh taka thlan tlin a ni.

BJP Mizoram State President kalchhuak Pu Vanlalhmuaka chuan amah thlaktu, President thar Dr. K. Beichhua chu a lawmpui thu a sawi a. Hmasawwnna chu khawpui nilovin thingtlang atangin a in tan a ti a, party-a an awm chuan hruiatu tura an President thlan chu mi eng ang pawh ni se, a chak chuan a rualin chak takin a hnung an zui ang a, a chak loh chuan amah tichak turin hna an thawk tur a ni a ti.

<><><>